



საჯარო სამართლის იურიდიული პირი -  
ბათუმის შოთა რუსთაველის სახელმწიფო უნივერსიტეტის  
აკადემიური საბჭო

და დ გ ე ნ ი ლ ე ბ ა № 06-01/55

ქ. ბათუმი

08 მაისი, 2023 წ.

„ბსუ-ს დოქტორანტურის დებულების დამტკიცების შესახებ“ აკადემიური საბჭოს 2017 წლის 5 აპრილის №19 დადგენილებაში ცვლილებების და დამატებების შეტანის თაობაზე

„უმაღლესი განათლების შესახებ“ საქართველოს კანონის 21-ე მუხლის 1-ლი პუნქტის და 46-ე მუხლის „გ“ ქვეპუნქტის, ბსუ-ს წესდების მე-8 მუხლის მე-4 პუნქტისა და რექტორის მოადგილის ანზორ ბერიძის სამსახურებრივი ბარათის (MES 3 23 0000488643, 03.05.2023) საფუძველზე, აკადემიურმა საბჭომ

და ა დ გ ი ნ ა:

1. „ბსუ-ს დოქტორანტურის დებულების დამტკიცების შესახებ“ აკადემიური საბჭოს 2017 წლის 5 აპრილის №19 დადგენილებაში, კერძოდ, N1 დანართში (დებულება) შევიდეს შემდეგი ცვლილებები და დამატებები:

ა) მე-4 მუხლის მე-4 პუნქტის „გ“ ქვეპუნქტი ჩამოყალიბდეს შემდეგი რედაქციით:

„გ) ქართული ენის არანაკლებ B2 დონეზე ცოდნა. კანდიდატისათვის, რომლისთვისაც ქართული ენა მშობლიური არ არის და სურს სწავლა ქართულენოვან პროგრამაზე, სავალდებულოა ქართული ენის B2 დონეზე ფლობის დამადასტურებელი სერტიფიკატის წარმოდგენა, წინააღმდეგ შემთხვევაში იგი ვალდებულია ჩააბაროს ბსუ-ს მიერ ორგანიზებული გამოცდა ქართულ ენაში.“

ბ) მე-5 მუხლის პირველი პუნქტი ჩამოყალიბდეს შემდეგი რედაქციით:

„1. დოქტორანტის სამეცნიერო ხელმძღვანელი შეიძლება იყოს ბსუ-ს პროფესორი ან ასოცირებული პროფესორი, ასევე, დოქტორის ან მასთან გათანაბრებული აკადემიური ხარისხის მქონე ბსუ-ს სამეცნიერო თანამდებობის პირი (მთავარი მეცნიერი თანამშრომელი/უფროსი მეცნიერი თანამშრომელი). სამეცნიერო ხელმძღვანელს უნდა ჰქონდეს დოქტორანტის სადისერტაციო თემასთან დაკავშირებულ სამეცნიერო სფეროში კვლევის გამოცდილება და შესაბამისი პუბლიკაციები აკადემიური საბჭოს მიერ დამტკიცებულ, მათ შორის მინიმუმ ერთი Web of Science (Clarivate Analytics), Scopus და ERIH PLUS (European Reference Index of the Humanities) (ჰუმანიტარული და სოციალური მიმართულებით) ბაზებში ინდექსირებულ მაღალრეიტინგულ რეფერირებად/რეცენზირებად სამეცნიერო ჟურნალებში“.

გ) მე-5 მუხლს მე-6 პუნქტის შემდეგ დაემატოს შემდეგი შინაარსის მე-7 პუნქტი:

„7. სამეცნიერო ხელმძღვანელის ძირითადი ფუნქციებია:

ა) რეგულარულად გაუწიოს კონსულტაციები დოქტორანტს, რაც გულისხმობს შემდეგს: კონსულტაციის სიხშირე უნდა შეესაბამებოდეს პროგრამისა და საკვლევი თემის სპეციფიკას; კონსულტაცია უნდა მოიცავდეს დოქტორანტის პროგრესის პერიოდულ შეფასებას, ზოგადი სამეცნიერო რჩევების მიცემას, დახმარებას კვლევის დიზაინსა და პროექტის მენეჯმენტში, სემინარის/კოლოქვიუმის/სამეცნიერო-კვლევითი ნაშრომის/დისერტაციის წერის პროცესში, ადგილობრივ და საერთაშორისო სამეცნიერო ქსელში ინტეგრირების პროცესში, ადგილობრივ და საერთაშორისო სამეცნიერო ღონისძიებებში მონაწილეობისა და შედეგების წარდგენის პროცესში, აგრეთვე სამეცნიერო სტატიების რეფერირებად ჟურნალში გამოქვეყნების შესახებ რჩევების მიცემას;

ბ) შეასრულოს სამეცნიერო ხელმძღვანელისათვის საქართველოს კანონმდებლობით და წინამდებარე დებულებით განსაზღვრული აქტივობები, მათ შორის წარმოადგინოს სადისერტაციო ნაშრომის შესახებ ამ დებულებით გათვალისწინებული დასკვნები.“

დ) მე-10 მუხლის შემდეგ დაემატოს შემდეგი შინაარსის მე-10<sup>1</sup> მუხლი:

„მუხლი 10<sup>1</sup>. სადისერტაციო ნაშრომის ანტიპლაგის პროგრამით შემოწმება

1. დოქტორანტი ვალდებულია სადისერტაციო ნაშრომის წინასწარ განხილვამდე (აპრობაციაზე) ატვირთოს სადისერტაციო ნაშრომი Moodle-ის პლატფორმაზე, ანტიპლაგის (მსგავსების დეტექტირების) პროგრამის მეშვეობით სადისერტაციო ნაშრომში მსგავსების არსებობის შემოწმების მიზნით.

2. დოქტორანტის ნაშრომში მსგავსების არარსებობის შემთხვევაში დოქტორანტის სამეცნიერო ხელმძღვანელი ფაკულტეტის დეკანს წარუდგენს დასკვნას სადისერტაციო ნაშრომის აპრობაციაზე დაშვების შესახებ. აღნიშნული დასკვნა უნდა მოიცავდეს შემდეგ ინფორმაციას: ა) ნაშრომის დასახელება; ბ) ავტორის ვინაობა; გ) ნაშრომის მოკლე მიმოხილვა; დ) ნაშრომის ძლიერი და სუსტი მხარეების აღნიშვნა, შესაბამისი შენიშვნებისა და რეკომენდაციების მითითებით; ე) მსგავსების დეტექტირების (ანტიპლაგის პროგრამა) შედეგად გამოვლენილ მსგავსების მაჩვენებელი; ვ) არგუმენტირებულ პოზიცია ნაშრომის წინასწარ დაცვაზე (აპრობაცია) დაშვების მიზანშეწონილობის თაობაზე. აღნიშნული დასკვნა ხელმძღვანელმა უნდა გააცნოს დოქტორანტს და მხოლოდ ამის შემდეგ წარუდგინოს შესაბამის დარგობრივ დეპარტამენტს, Moodle-ის პლატფორმაზე ატვირთულ და ანტიპლაგის პროგრამის მიერ შეფასებული ნაშრომის ელექტრონულ ვერსიასთან ერთად.

3. დოქტორანტის ნაშრომში სხვა ნაშრომთან მაღალი ხარისხით მსგავსების არსებობის შემთხვევაში, სამეცნიერო ხელმძღვანელი Moodle-ის პლატფორმაზე უთითებს შესაბამის კომენტარებს და აღნიშნავს/უთითებს მსგავსებების დასაშვებ კატეგორიებზე (ლიტერატურა, ციტირება, საკანონმდებლო აქტი და სხვა). დოქტორანტის სამეცნიერო ხელმძღვანელი ფაკულტეტის დეკანს წარუდგენს დასკვნას დოქტორანტის მიერ სადისერტაციო ნაშრომში არსებული მსგავსებების აღმოფხვრის შემდეგ ანტიპლაგის პროგრამაში ხელახლა ატვირთვის საჭიროების თაობაზე. აღნიშნული დასკვნა ფაკულტეტის დეკანისათვის წარდგენამდე სამეცნიერო ხელმძღვანელმა უნდა გააცნოს დოქტორანტს.

4. დოქტორანტი უფლებამოსილია ანტიპლაგის (მსგავსების დეტექტირების) პროგრამაში პირველადი შემოწმების შემდეგ სხვა ნაშრომთან მაღალი ხარისხით მსგავსების არსებობის შემთხვევაში, დოქტორანტის სამეცნიერო ხელმძღვანელის დასკვნის

გათვალისწინებით, 15 დღის ვადაში ხელახლა ატვირთოს ნაშრომი Moodle-ის პლატფორმაზე. ამის შემდეგ მსგავსების განმეორებით აღმოჩენის შემთხვევაში ფაკულტეტის დეკანის სამსახურებრივი ბარათის საფუძველზე გამოცემული ბსუ-ს რექტორის ბრძანებით იქმნება კომისია, შესაბამისი ფაკულტეტის დეკანის, ფაკულტეტის ხარისხის სამსახურის უფროსის, სამეცნიერო კვლევების სამსახურის, სადისერტაციო საბჭოს თავმჯდომარის, შესაბამისი დარგის სპეციალისტების შემადგენლობით, რომლებიც იკვლევენ ნაშრომში მსგავსების საკითხს (პლაგიატის ნიშნებს). კომისია ნაშრომის შემოწმებიდან არაუგვიანეს 5 კალენდარულ დღეში იღებს გადაწყვეტილებას სადისერტაციო ნაშრომის აპრობაციაზე დაშვების ან დაუშვებლობის შესახებ, საქართველოს კანონმდებლობისა და წინამდებარე დებულების მოთხოვნათა გათვალისწინებით. კომისიის დასკვნა, კომისიის თავმჯდომარის სამსახურებრივი ბარათთან ერთად წარედგინება ბსუ-ს რექტორს, შემდგომი რეაგირებისათვის.“

ე) მე-16 მუხლის მე-2 და მე-3 პუნქტები ჩამოყალიბდეს შემდეგი რედაქციით:

„2. დოქტორანტურაში სწავლის საფასური განისაზღვრება ბსუ-ს წარმომადგენლობითი საბჭოს გადაწყვეტილებით და აისახება ბსუ-ს და დოქტორანტს შორის გაფორმებული ხელშეკრულებაში.

3. 2020-21 სასწავლო წლის დაწყებამდე ბსუ-ს სადოქტორო პროგრამებზე ჩარიცხულ დოქტორანტებთან გაფორმებულ „დოქტორანტურაში სწავლის ხარჯთაღრიცხვაში“ (წინამდებარე დებულების N9 ფორმის შესაბამისად, რომელიც არის ბსუ-ს და დოქტორანტს შორის გაფორმებული ხელშეკრულების განუყოფელი ნაწილი) ადმინისტრაციის ხელმძღვანელის ბრძანებით ცვლილებების შეტანის შემთხვევაში, გონივრულ ვადაში უნდა ეცნობოს დოქტორანტს.“


2. დადგენილება და წინამდებარე დადგენილების საფუძველზე მომზადებული ბსუ-ს დოქტორანტურის დებულების კოდიფიცირებული ვერსია გამოქვეყნდეს ბსუ-ს ვებგვერდზე.

3. დადგენილება დაეგზავნოს რექტორის მოადგილეებს და ბსუ-ს შესაბამის სტრუქტურულ ერთეულებს (სამეცნიერო კვლევების სამსახურს, იურიდიულ დეპარტამენტს, ფაკულტეტებს, სამეცნიერო-კვლევით ერთეულებს, საინფორმაციო ტექნოლოგიების სამსახურს, სასწავლო პროცესის დეპარტამენტს, საფინანსო-ეკონომიკურ დეპარტამენტს).

4. დადგენილება ძალაშია ხელმოწერისთანავე.

5. დადგენილება შეიძლება გასაჩივრდეს მისი გამოცემიდან ერთი თვის ვადაში ბათუმის საქალაქო სასამართლოში (ქ. ბათუმი, სტაფაბე ზუბალოშვილის №30).

აკადემიური საბჭოს თავმჯდომარე,  
რექტორი, პროფესორი



მერაბ ხალვაში